

# «En Svizra exista la pli pitschna schanza d'ir en praschun»

Il criminolog grischun retschaiva in premi internaziunal

CUN MARTIN KILLIAS HA DISCURRÌ  
CLAUDIA CADRUVI / ANR

■ **L'emna proxima retschaiva Martin Killias il «European Criminology Award». La surdada ha lieu a Budapest. La distincziun survegn il professor per sias stentas da stgaffir ina organisaziun europeica da criminologia e per sias perscrutaziuns internaziunalas.** Il professor per dretg penal lavura a l'universitad da Turitg ed è oriund d'Andiast. Killias ha perscrutà la criminalitad e giuventetgna, la violenza vers dunnas, assassinats cun armas, criminalitad economica, criminalitad ed immigraziun – per enumerar mo paucs da ses champs d'activitad

*Tge munta il premi per Vos?*

**Martin Killias:** I sa tracta d'in premi ch'ins ha dà fin uss a personas prominentas, a gliedud ch'jau hai adina considerà sco buns exempels. Uschia èsi sa chapescha empernaivel sch'ins po sa sentir a pe cun tala gliedud.

*Cun il premi renconuschan ins che Vos avais inizià in'organisaziun europeica per criminologia e plinavant Voss engaschi per cumparegliazions tranter ils systems giudizials europeics.*

En sasez na sun jau mai stà propi in ami da statisticas. Statisticas davan tan gea pir interessantas, sch'ins po cumparegljar co ch'insatge sa sviluppescha a lunga vista u sch'ins po cumparegljar differents pajais. En quest grà sun jau stà in pau in piunier. Durant mes temp en ils Stadis Unids hai jau vesì che nus duvrassan era ina statistica sco ils Americans avevan da lez temp. Or da quai è tranter auter naschida l'iniziativa per ina statistica europea da la criminalitad e da la giustia penala.

*A tge servan talas statisticas?*

Ins vesa per exempel quants polizists ch'in pajais ha. En l'Italia hai gea savens num, «Nus n'avain betg avunda polizists» En realitad è l'Italia il pajais cun il pli grond dumber da polizists tranter ils pajais occidentals. La statistica mussa era quants delicts ch'i dat en in u l'auter pajais. Las differenzas èn considerablas. Nus en Svizra avain ina giustia tut speziala. En noss pajais exista probabel la pli pitschna schanza da finir en praschun cumparegljà cun auters pajais europeics.



Il criminolog Martin Killias ha lavurà sco docent e perscrutader quasi sin tuts continents.

FOTO C. CADRUVI

*Ils chastis èn lass?*

La schanza da vegnir en praschun è particularmain flaivla, schizunt per delicts grevs sco rumper en, per enguladitsch cun violenza, per traffic cun drogas u per violenza vers dunnas. En tut ils auters pajais europeics vegnan ins per tals delicts pli spert en praschun.

*Quai è sa mussà tar ils giuvenils svizzers che han pitgà ensemen avant quatter onns in impedì a Minca.*

Il responsabel principal ha survegnì en Germania in chastis da var set onns praschun. Tar nus en Svizra avess el survegnì ina mesira da trenament cunter violenza. Quai è la realitad e quai mussan talas statisticas.

*Vos avais scrit varga ventg cudeschs davart differents aspects dal dretg penal. Tge ha fascinà Vos il pli fitg?*

Jau sun adina stà in pragmaticher ed hai gist tractà ils problems actuals. Ins sa dir ch'jau saja suandà in zichel la moda. Jau hai vulì contribuir ina tscherta infurmaziun sin plaun objectiv, per exempel pertutgant la violenza cunter las dunnas en la lètg. D'ina vart dramatisavan ins avant intgins onns questa dumonda e da l'autra devi malchapientschas. Ins scheva: Ina da tschintg dunnas saja pertutgada. Nus avain constatà che quai n'è betg uschia e che circa diesch pertschient da las dunnas èn pertutgadas sch'ins resguarda in'entira vita. I dat dentant in grond problem da violenza era ordaifer la lètg. La mulesta sin via è medemamain in aspect. In resultat particularmain interessant da nossas retschertgas: Sch'ina dunna daventa entaifer sia lètg unfrenda u betg, dependa da la tenuta dal partenari envers la violenza. Sch'in partenari ha demussà ina giada in cumportament violent insanu'uter, forsa sin via u en

ustaria, lura è la probabilitad fitg auta ch'el vegn baud u tard era ina giada ad esser violent envers la dunna a chasa.

*Tge perscrutais Vos da preschent?*

Nus faschain ina retschertga davart la delinquenza da giuvenils. Nus avain fatg intervistas cun 3000 giuvens en l'entira Svizra ed entschavain gist cun l'analisa. Tranter auter vulain nus savair, sch'i constat che la delinquenza giuvenila saja sa sminuida sco pretendì trasora. Forsa èsi uschia. I dat indizis. Ma i dovra anc mussaments.

*Vos dubitais pia che la delinquenza giuvenila saja ida enavos?*

Da principi dubitesch jau adina. Quai è ina tenuta scientifica. Ins sto adina esser critic. I dat adina surpraisas. Forsa èn las chaussas betg uschia sco quintà? Gliez èn ils muments pli interessants en la vita d'in perscrutader, sch'ils resultats na conferman betg ina ipotesa raschunai vla. Co èsi alura d'explitgar ch'igl è auter? Quai è ina dira nusch. Ins sto far ponderaziuns, tschertgar explicaziuns.

*Vos avais era perscrutà ils effects da pastuiras electronicas che fissan forsa ina giada ina alternativa al chastis da praschun. Tge enconuschientschas datti?*

Nus avain cumparegljà il chastis en praschun cun il «electronic monitoring» e cun il chastis da la lavur cumina. Igl è sa mussà ch'il electronic monitoring, nua ch'il deliquent resta a chasa, ha effects positivs sin las personas pertutgadas – era anc suenter diesch onns. La lavur cumina n'è betg uschè persistenta. Quai è stà ina surpraisa positiva ch'ins n'avess betg spetgà.

*Vos faschais era politica en la partida socialdemocrata. Co sa cumporta quai cun la scienza?*

Jau hai adina tschertgà d'avair ina tenuta averta pertutgant ils resultats da perscrutaziun. En ina retschertga datti adina insatge nov e quai mantegn giuven. Jau na sun dentant betg mo in scienzià, mabain era in burgais, in burgais engaschà uschèbain sin plaun politic local sco era en il Grischun. Quai è impurtant per mai. Ins sto s'occupar d'ina vart da sia lavur, en mes cas è quai la retschertga scientifica. Ma dasperas drov jau era l'experientscha pratica ed il contact direct cun la vita politica.